

Date – 03/06/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Khuarel chhiatna in kawlphehtha pekchhuahna khawl a tih chhiat hnuah 33kV North Bukpui Sub Station tih loh chu Sub-Station zawng zawng atangin power an dawng kim tawh.
- 2. Fur ruahtui a tlak nasat avangin Mizoram sawrkar chuan, sawrkar laipui leh state dang atanga mi pawimawh lo zin turte chu, tun thla June 13 hnulam hun remchang dang ruahman turin a ngen .
- 3. Prime Minister Narendra chuan vawiin khan ruahsur nasa avanga harsatna tawh mek Sikkim leh Assam Chief Minister te a bia.
- 4. Darkar 24 kalta chhungin Assam tuilian chuan zual lam a pan.



POWER SUPPLY

Khuarel chhiatna in kawlphehtha pekchhuahna khawl a tih chhiat hnuah 33kV North Bukpui Sub Station tih loh chu Sub-Station zawng zawng atangin power an dawng kim tawh a, North Bukpui Sub-Station pekna line pawh endik mek a ni a, hun reiloteah power pekchhuah theih beisei a ni.

Vawiin khan Power & Electricity Department Minister Pu F Rodinglana ho in P&E Department officer-te nen Minister office chamber-ah kawlphehtha chungchang hi ngaihtuah a ni a, khaw thenkhat power supply pekchhawna feeder thenkhat line chhia pawh a tahtawlin siamthat mek zel a nih thu tarlan a ni.

Distribution transformer chhiate pawh thlak mek zel a ni a, vawiin hian transformer 5 pekchhuah thu tarlan a ni a. Aizawl khawpui bikah khaw chhia leh harsatna dang a awm loh chuan naktuk hian power pek kim theih beisei a ni.

Hetihlai hian Zuangtui leh Bukpui inkar 132 KV line load tam zawk keng thei HTLS conductor-a thlakna tur leh Mizoram chhung hmun hrang hranga Sub-station 7 - Bawktlang, Saitual, Melriat, Khawzawl, Champhai, Serchhip Bukpui, East Lungdar Transformer lian zawk dahna tur cheng vaibelchhe 47 leh nuai 87 chu DONER in an

rawn pekchhuak tawh thu tarlan a ni a. He project hi zawh a nih chuan Zuangtui leh Bukpui (Serchhip) inkar a MW 80 chauh load la thei thin kha 200MW thleng load an la thei toh dawn a ni. Hei hi Saitual District, Khawzawl District, Champhai District leh Serchhip District ten an tangkai pui hle dawn a ni tih Minister chuan a sawi a ni.

(DIPR)

<><><>

WATER SUPPLY

PHE Dept chuan khuarel chhiatna avangin Aizawl khawpui chhung tui semna lamah harsatna a tawk a, tui an sem mumal thei rih lo tih an sawi.

Hemi chungchangah thuchhuah an siamah, tun hnai ruahsur nasa avanga Tuilian leh tui nu nasa lutuk avangin Aizawl khawpui chawmtu Greater Aizawl Water Supply Scheme (GAWSS) Phase - I & II te chu kar kalta zirtawpni atang khan Tui pump theih a ni lo a. Power Transformer lam that loh bawk avangin GAWSS – III, Setlak atangin Tui a pump theih lo bawk a ni.

Vaivakawn – Zohnuai lei tlakhniamna hmunah GAWSS – III tui pump-na Pipe atangin thawhtanni atang khan nasa takin tui a lo chhuak a. Tui pump loh lai a nih avangin hetiang a tui lo chhuak vak mai hi a chhan hriatthiam a har in helaia cheng mipui te an ralkhel hle tih hriat a ni a, pawl hle a ni an ti a, Kar kalta zirtawpni khan Zemabawk South (NH 54) kawngchhak lam inhmun laihna hmunah nasa takin lei a min a, he leimin hian a chhak tlang, Beraw Tlang panna kawng hrula kal Assam Rifles leh Lungbial mipui te tui pekna Pipe line a hnawh chhia a. Hemi a nih vangin tun thlengin tui supply theih ala ni lo a, Pipe line siamthat hna ngawrh taka thawh mek a ni bawk.

Heng chhan hrang hrang avang hian khawpui chhungah tuisem mumal theih a ni lova. Khaw chin leh tui dinhmun hrang hrangte thlin pangngai taka tui sem leh theih hun tur hi chiang taka sawi theih a ni lo tih PHE Dept chuan sawiin ruahtui dahkhawh lamah tan lo la zel turin mipui a chah a ni.

(PR)

<><><>

WEATHER

Fur ruahtui a tlak nasat avangin Mizoram sawrkar chuan, sawrkar laipui leh state dang atanga mi pawimawh lo zin turte chu, tun thla June 13 hnulam hun remchang dang lo ruahman hram turin a ngen a ni.

Mizoram state pumah ni eng emaw zat chhung ruah nasa tak a sur avangin chhiatna hrang hrang, leimin, lungrem chim, lung tla, tuilian leh saberekakhuangkaih te a thleng a, nunna hial chan phahte an awm bawk a. He khuarel chhiatna thleng mek avang hian District hrang hrangah mipui nunphung a buai phah nasa hle a, District tina Deputy Commissioner-te kaihhruaina hnuaiah District Disaster Management Authority (DDMA) te chuan chhiatna thlenna hmun te urhsun taka vilin chhiat tawkte chhawmdawl hna ngawrh takin an kalpui mek zel a. Hetiang hi thil awmdan a nih avangin District-a hruaitute chuan ram pawn atanga VIP lo zinte pawh, lo mikhuah leh lo dawnawn kawngah harsatna an tawh tih sorkar thuchhuah chuan a sawi a ni.

Indian Meteorological Department (IMD), Regional Meteorological Centre, Guwahati-in a puan lawk danin, thlipui leh ruahpui thawk reng thei dinhmunah Mizoram chu a lan avang leh chhiatna thleng mek leh thleng zel theite thlin, mipui him tlan zawk nan leh chhanchhuah leh chhawmdawl hnate chak zawka hlenchhuah a nih theih nan hetianga thuchhuah siam hi a nih thu sorkar chuan a sawi a ni.

(DIPR)

<><><>

UNION MOS

Chief Minister Pu Lalduhoman Mizoram tlawha lo zin mek Union Minister of State for Road Transport & Highways Pu Ajay Tamta hnenah Silchar atanga Aizawl 4 lane laih mekah Kawnpui leh Sairang inkar hnathawhna tur sum pe chhuak rang turin a ngen.

Chief Minister chuan kawngpui chu India ram laili nena inkalpawhna kawngpui pawimawh bik a ni a ti a. Kawnpui leh Sairang inkar chu kutthlak a nih rih loh avangin nikum furah nasa takin harsatna an tawk tih sawiin kuminah harsatna an tawk leh mek a ti a, a inkar hnathawhna tur sum chu sawrkar laipuiin a la pe chhuak lo tih sawiin Mizoram chak lakna kawngpui ber anih avangin hmalak pui thuai turin a ngen a ni.

Chief Minister hian, Mizorana National Highway te chu awlsam zawk leh rang zawka thawh a nih theih nan Strategic Highway a puan tha a tih thu te, fur ruahtui tlak tamna ram a nih vanga concrete zela kawngpui siam tha a tih thute a lo hrilh a. Heliport din tura hmalakna kal mek chanchin a sawipui bawk.

Pu Ajay Tamta hian, Chief Minister thil sawi te chu theihtawp chhuahin a lo bawhzui tih a sawi a. Inkawmna hun tha tak a siamsak avangin a lawm thu a sawi bawk.

Union Minister of State hian tun kar khan Hnahthial District pawh tlawhin Higher Secondary School building Samagra Shiksha hnuaia sak a tlawh bawk a, hemi zawh hian DC Conference Hall ah District chhunga mi pawimawh te kawmin Central Scheme hrang hrang an sawiho a, District chhunga hmalakna kal mek te leh hmachhawp hrang hrang te sawi ho a ni.

(DIPR)

<><><>

OCULAR TRAUMA

Aizawl Civil Hospital-a Eye Specialist Dr Zoremkawii’n mit enkawl uluk a pawimawh tih sawiin mita bawlhhlawh a luhin nuai mai loa tuia fai taka sil a pawimawh a ti.

Dr Zoremkawii sawi danin thli thaw leh lirthei khalh changin mitah bawlhhlawh tam tak a lut thei a, heng bakah hian Grinder leh Welding khawih zingah thir them a lut duh thin tih sawiin fimkhur a ngai hle a ti a, hengah hian mit chu nuai mai lo tur leh tuia sil fai a pawimawh tih sawiin a fiah theih mai loh chuan Doctor rawn vat a pawimawh tih a sawi.

Mithiam te sawi danin mita bawlhhlawh leh thir them awm hi lak chhuah lohva rei tak a awm chuan mit ulcer a thlen thei a, heng bakah hian tauh palh emaw accident emaw avanga mit meng theilo ten enkawl na tha tak an hmuh theih nan doctor pan vat a pawimawh hle a ni.



WORLD BICYCLE DAY

World Bicycle Day pualin vawiin khan Mizoram Cycling Association chuan Mizorama thirsakawr khalh thin zawng zawngte World Bicycle Day chibai an buk.

World Bicycle Day hi United Nation General Assembly chuan kum 2018, April khan hman tan turin a rel a, heta tang hian kum tin June 3 hi World Bicycle Day atan hman a lo ni ta a, World Bicycle Day ah hian rilru leh taksa hrisel neih inzirtir te, boruak thianghlim lo pung zel tur ti reh tura hmalak bakah nitin veivahna kawnga harsatna thlen lo zawnga hmalak hi a pawimawh zual a ni.

Mizoramah pawh World Bicycle Day hi Mizoram Cycling Association hmalakna in kumtin hman thin a ni a, cycle rally te buatsaihin he ni-ah World Bicycle Day in a tum hrang hrang inzirtirna atan hun hman a ni.

(Corr : Chawnga)



IDY

Rilru leh taksa hrisel nei tura khawvel pum huapa Yoga insawizawina inzirtirna kalpui mekah, International Day of Yoga chu tun thla ni 21 a hmang turin inbuatsaihna kalpui mek a ni a,

Kumin IDY thupui atan hian Yoga for One Earth, One Health tih hman a ni dawn a. Yoga hi sorkar laipuiin a ngaipawimawh hle a, India rama State tinah International Yoga Day hi hmang tura ruahmanna kalpui mek a ni. Mizoram ah chuan Directorate of Ayush leh 1 Mizo Sqn NCC te ruahmanna in Aizawl ah hman tum a ni a, inpuahchah kalpui mek a ni.

Directorate of Ayush, National Ayush Mission hnuaia Yoga Instructor Pi Hmingthantluangi chuan Yoga chu damdawi ei ngailoa mahni hriselna enkawl nan a tangkai hle a ni a ti a, tunlai natna buaipui awm tak non communicable disease hrang hrang BP sang, Zunthlum taksa na leh rilru hah vanga natna miin an vei thin te enkawl nan Yoga chu a tha hle ani a ti a. Yoga a thawk lak dan insawizawina chu mihring taksa boruak tha hip luh dan inzirtirna a ni a ti a, chuap leh rilru lama natna nei te tan damdawi tha tak a ni ati.

Pi Hmingthantluangi chuan Yoga chu hnamdang tih atan chauh khek loa, Mizorama cheng Mizote ngei pawh in ti ve thin tura a duh bakah mipuite chuan yoga chu lo hmang tangkai theuh tur in a sawm.



MZP PR

Mizo Zirlai Pawl MZP General Headquarters thutkhawm hmanhmawh vawiina an kohah Health Department peng pakhat NHM hnuaia hna hrang hrang lakah, Advertisement leh dan tlawhchhan awm mumal loa hna lak a awm ngei tih sawiin, tun thla ni 10 ral hma ngeia heng hna lakte hi sut nghal turin sawrkar an ngen a ni.

MZP chuan tunhnaia Health Department hnuaia hnalakah, Advertisement pawh chhuah loa, duhsak zawngte lak an awm tih thuthang a hriat veleh theih ang angin a chhui nghal an ti a. National Health Mission (NHM) hnuaia post 7; Lab. Technician- 3, Staff Nurse- 2, Asst. Data Manager-1 leh Executive Asst.- 1 te chu Advertisement tello a lak ngei an ni an ti. NHM hnuaia dan dik taka hna lakte chu, an website-ah awlsam taka en leh hmuh theih a nih laiin, tuna mi te chu tarlang lovin a ruk a rala lak ngei tih a chiangah MZP chuan a ngai a ni, an ti.

Thalaite rilru tina tu leh, ti hnual thei zawnga hmalakna hi engti kawng pawhin a enliam dawn lo a, tuna Health Department-in NHM hnuaia hna pasarih lai Advertisement pawh chhuah loa an lo lak tawh chu sut nghal a phut a ni, an ti.

(PR)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM

Prime Minister Narendra chuan vawiin khan ruahsur nasa avanga harsatna tawh mek Sikkim leh Assam Chief Minister te a bia. PM Modia chuan Assam Chief Minsiter Himanta Biswa Sarma hnenah state chhunga tuilian dinhmun chuang sawipuiin sawrkar laipuiin chhawmdawlina leh puihna pe turin a inpeih thu a sawi a ni.

Hetihlai hian darkar 24 kalta chhungin Assam tuilian chuan zual lam a pan a. District panga dang a chim belh leh tawh a. Tun dinhmunah district 21 a mihring nuai 5 chaungin harsatna an tawh tawh a ni. Thlai chinna hectare 12600 chuanga zau tuilian hian a chim tawh a ni. Prime Minister Modia hian Sikkim Chief Minister Prem Singh Tamang pawh biain Sikkim hmarlama sipai camp leiminin a hnawl chungchang a zawtfiah bawk a. Pu Tamang-a chuan Prime Minister hi thil thlendan lo hrihfhahin a ngaihven avangin lawmthu a hrih a ni.

(Newsonair)



PM

Prime Minister Narendra Modia chuan India chu space-aviation sector ah khawvel hmahruaitu a ni chho mek a ti. International Air Transport Association, IATA Annual General Meeting vawi 81 na leh World Air Transport Summit Plenary Session a hmanpuinaah he thu hi sawiin thlawhnaa zin veivahna civil aviation sector lamin tun kum 10 kalta chhungin nasa takin hma a sawn a ti a.

Pu Modia chuan UDAN scheme hlawhtlinna chuan Indian civil aviation lamah hun rangkachak a thlentir tih sawiin tun dinhmunah India chu khawvelah tualchhunga thlawhnaa zin veivahnaah sum thawkchhuak tam pathumna a ni a ti bawk.

(Newsonair)

